

四庫全書

史部

欽定四庫全書

隸釋卷二十

宋 洪适 撰

水經

司馬遷碑

在夏陽文云高門華池在茲夏陽夏陽號邑也華池方三百六十步永嘉四年漢陽太守殷濟瞻仰遺文及其功德遂建石室立碑樹垣太史公自叙曰遷生於龍門是其墳墟所在

洛陽北界碑

洛縣河水之南岸有一碑北面題云洛陽北界上舊有河平侯祠祠前有碑今不知所在

夷齊廟碑

首陽山上有夷齊廟前有二碑並是後漢河南尹廣陵陳導雒陽令徐循與處士平原蘇騰南陽何進等立

郭林宗宋子浚碑

介休縣有徵士郭林宗宋子浚二碑宋冲以有道司徒

徵林宗縣人也辟司徒舉大尉以疾辭其碑文云將蹈
洪崖之遐迹紹巢由之逸軌翔區外以舒翼超天衢以
高峙稟命不融享年四十有三建寧四年正月丁亥卒
凡我四方同好之人永懷哀痛乃樹碑表墓昭銘景行
云陳留蔡伯喈范陽盧子幹扶風馬日碑等遠來奔喪
持朋友服心喪暮年者如韓子助宋子浚等二十四人
其餘門人著錫衰者千數其碑文故蔡伯喈謂盧子幹
馬日碑曰吾為天下碑文多矣皆有慙容唯郭有道無

愧於色矣

堯廟碑

平陽縣汾水東原上有小臺臺上有堯神屋石碑

石門銘

滎陽有浚儀渠建寧四年於敖城西北壘石為門以遏渠口謂之石門西去河三里石銘云建寧四年十一月黃場石也而主吏姓名磨滅不可復識

王誨碑

榮口石門南際河有碑云惟陽嘉三年二月丁丑使河
堤謁者王誨疏達河川述荒庶土云大河衡塞侵齧金
堤以竹籠石葺土而為遏壞隕無已功消億萬請以濱
河郡徒疏山采石壘以為鄣功業旣就徭役用息未詳
詔書許誨立功府鄉規基經始詔榮加命遷在沅州乃
簡朱軒授使司馬登令纘茂前緒稱遂休功登以伊洛合
注大河南則緣山東過大伾回流北岸其勢鬱鬱濤怒
湍急激疾一有決溢彌原淹野蟻孔之變害起不測蓋

自姬氏之所常感昔崇鯨所不能治我二宗之所劬勞
於是乃跋涉躬親經之營之比率百姓議之于臣伐石
三谷水匠致治立激岸側以捍鴻波隨時慶賜說以勸
之川無滯越水土通演役未踰年而功程有畢斯乃元
勲之嘉課上德之弘表也昔禹修九道書錄其功后稷
躬稼詩列于雅夫不憚勞謙之勤夙興厥職充國惠民
安得湮沒而不章焉故遂刊石記功垂示于後其辭云
云使河堤謁者山陽東昏司馬登宇伯志伐東萊典城

王誨字孟堅河內太守宋城向豹字伯尹丞汝南鄧方
字德山懷令劉丞字季意河堤掾匠等造陳留浚儀遣
韶字孝先頌石銘歲遠字多淪缺其所滅蓋闕如也

劉孟陽碑

酸棗縣城內有漢酸棗令劉孟陽碑

王紛碑

須朐城安民山有冀州刺史王紛碑漢中平四年立

薛季像碑

昌邑縣有沅州刺史河東薛季像碑以郎中拜郟令甘露降園熹平四年遷州明年甘露復降殿前樹從事馮巡主簿華操等相與裊樹表勒棠政

楊叔恭碑

又有沅州刺史茂陽楊叔恭碑從事孫光等以建寧四年立

班孟堅碑

又有東太山成人班孟堅碑建和十年尚書右丞拜沅

州刺史從事秦閏等刊石頌德政

李剛碑

鉅野黃水南有荊州刺史李剛墓剛字叔毅山陽高平人熹平元年卒見其碑有石闕祠堂石室三間椽架高丈餘鏤石作椽瓦屋施平天造方井側荷梁柱四壁隱起彫刻為君臣官屬龜龍麟鳳之文飛禽走獸之像作制工麗不甚傷毀

魯恭碑

戴延之西征記曰焦氏山北數山有漢司隸校尉魯恭
穿山得白蛇白兔不葬更葬山南鑿而得金故曰金鄉
山山形峻峭冢前有石祠石廟四壁皆青石隱起自書
契以來忠臣孝子貞婦孔子及弟子七十二人形像像
邊皆刻石記之文字分明

范巨卿碑

金鄉有范巨卿冢名件猶存

范巨卿碑至今尚在恐
名件二字水經誤也

卿名式山陽之金鄉人漢荊州刺史與汝南張劭長沙

陳平子石交號為死友

趙越碑

獲嘉縣西有漢桂陽太守趙越墓冢北有碑越字彥善
縣人也累遷桂陽郡五官將尚書僕射遭憂服闋守河
南尹建寧中卒碑東又有一碑碑北有石柱石牛羊虎
皆碎淪毀莫記

比干碑

朝歌縣牧野有殷大夫比干冢前有石銘題隸云殷大

夫比干之墓所記唯此今已中折不知誰所誌也

李雲碑

廣宗縣清河之右有李雲墓雲字行祖甘陵人好學善陰陽舉孝廉遷白馬令中常侍單超等立掖庭民女亳氏為后家封者四人賞賜巨萬雲上書移列三府曰孔子云帝者諦也今尺一拜用不逕御者是帝欲不諦乎帝怒下獄殺之後冀州刺史賈瑤使行部過祠雲墓刻石表之今石柱尚存俗猶謂之李氏石柱

漳河神壇碑

鉅鹿縣銅馬祠側有碑述河內修武縣張導字景明以
建和三年為鉅鹿太守漳津汎濫土不稼穡導披按地
圖與丞彭叅掾馬道嵩等原其逆順揆其表裏修防排
通正水路功績有成民用嘉賴題云漳河神壇碑而俗
老者儒猶揭斯廟為銅馬劉神寺是碑頃因震裂餘半
不可復識矣

太公廟碑

汲縣有太公廟廟前有碑云太公望者河內汲人也縣民故會稽太守杜宣白令崔瑗曰太公本生於汲舊居猶存君與高國同宗太公載在經傳今臨此國宜正其位以明尊祖之義於是國老王喜廷掾鄭篤功曹郗勤等咸曰宜之遂立壇祀為之位主

冀州北界碑

代郡靈邱縣高氏山上有石銘題云冀州北界世謂之石銘陁

張平仲碑

盧奴縣有漢上谷太守議郎張平仲碑光和中立

王立碑

安喜縣有漢明帝時孝子王立碑

幽冀二州界石文

北平縣界有漢熹平四年幽冀二州以戊子詔書遣冀州從事王球幽州從事張昭郡縣分境立石標界具揭石文也

趙徵碑

安平縣城內有漢冀州從事安平趙徵碑

大石嶺碑

新城縣大石山上有大石嶺碑河南隱士通明以漢獻
帝中平六年八月戊辰於山堂立碑文字淺鄙殆不可
尋

洛陽橋石柱銘

洛陽建春門石橋建兩石柱橋之石柱銘曰陽嘉四年

乙酉壬申詔書以城下漕渠東通河濟南引江淮方貢
委輸所由而至使中謁者魏郡清淵馬憲監作石橋梁
柱敦勅工匠盡要妙之巧攢立重石累高周距橋工路
博流通萬里云河南尹邴崇隗丞勃海重合雙福水曹
掾中年任防史王蔭史趙興將作吏睢陽申翔道橋掾
成臯卑國洛陽令江雙丞平陽降監掾王騰之主石作
右北平山仲三月起作八月畢成

石經

魏三字石經
魏典論六碑

漢靈帝光和六年刻石鏤碑載五經立於大學講堂前
悉在東側蔡邕以熹平四年與五官中郎將堂谿典
光祿大夫彈議郎張訓韓說太史令單颺等奏求正定
六經文字靈帝許之邕乃自書丹於碑使工鐫刻立於
太學門外於是後儒晚學咸取正焉及碑始立其觀視
及筆寫者車乘日千餘兩填塞街陌今碑上悉刻蔡邕
等名魏正始中又立古篆隸三字石經魏文帝又刊典
論六碑附于其次陸機言大學贊別一碑在講堂西下

列石龜碑載蔡邕韓說堂谿等名太學弟子贊復一碑在外門中今二碑並無

太學碑

石經東有一碑是漢順帝陽嘉八年立碑文云建武二十七年造太學年積毀壞永建六年九月詔書修太學刻石記年用作工徒十一萬二千人陽嘉九年八月作畢碑南面刻頌表裏鏤字猶存不破

趙融碑

郁夷縣有漢邠州刺史趙融碑靈帝建安元年立

五部神廟碑

鄭縣城南山北有五部神廟廟前有碑漢光和四年鄭縣令河東裴畢字君先立

華山祠堂碑

華陰縣華山下有漢魏文帝三廟廟有石闕數碑一碑是建安中立漢鎮遠將軍段熲更修祠堂碑文漢給事黃門侍郎張昶造昶自書之元帝又刊其二十餘字二

書有重名傳於海內又刊傳中司隸校尉鍾繇弘農太守毋丘儉姓名廣六行鬱然循平是太康八年弘農太守河東衛叔始為華陰令河東裴仲恂役其逸力修立壇廟引道樹栢迄于山陰事見永興元年華百石所造碑

河南界石柱

洛陽南界碑

汝南出南山北流逕石碣東柱側刊云河南界又有一碣題云洛陽南界碑柱相對既無年月竟不知何代所

表也

葉公廟碑

葉縣有公子高諸梁碑令長汝南陳晞以魏正始元年立

張明府祠碑

平輿縣有神廟謂之張明府祠水旱之不節則禱之廟前有圭碑文字紊碎不可復尋

許由廟碑

潁川其縣箕山有許由廟碑闕尚存是漢潁川太守朱寵所立

郭奉孝碑

九山祠碑

陽翟縣有郭奉孝碑側水有九山祠碑叢栢猶茂北枕川流也

司馬文預碑

灞陵明渠北有漢京兆尹司馬文預碑

梁巖碑

成國渠左有安定梁巖冢碑碣尚存

魏受禪碑

繁昌縣城內有三臺時人謂之繁昌臺壇前有二碑魏文帝受禪於此自壇而降曰舜禹之事吾知之矣故其石銘曰遂於繁昌築靈壇也於後其碑六字生金論者以為司馬金行故曹氏六世遷魏而事晉

張伯雅碑

綏水東南流逕漢弘農太守張伯雅墓塋四周壘石為

垣隅阿相降列於綏水之陰庾門表二石闕夾對石獸
於闕下冢前有石廟列植三碑碑云德字伯雅河內密
人也碑側樹兩石人有數石柱及諸石獸舊引綏水南
入塋域而為池沼沼在丑地皆蟾蜍吐水石湟承溜池
之南又建石樓石廟前又翼列諸獸但物謝時淪凋毀
殆盡夫富而非義比之浮雲況復此乎王孫士安斯為
達矣

袁梁碑

扶溝縣有袁梁碑云梁陳扶樂人

王君造四縣邨碑

陳縣城內有漢相王君造四縣邨碑文字剥缺不可悉識其略曰唯茲陳國故曰淮陽郡云云王清惠著聞為百姓畏愛求賢養士千有餘人賜與田宅吏舍自損奉錢助之成邨五官掾西華陳箕等二百五人以延熹二年云云故其頌曰修德立功四縣回附今碑之左右遺墉尚存基礎猶在時人不復尋其碑證云孔子廟學非

也

袁滂碑

袁騰碑
袁光碑

過水逕大扶城西城之東北悉諸袁舊墓碑字傾低羊
虎碎折唯司徒滂蜀郡太守騰博平令光碑字所存唯
此自餘殆不可尋

許續碑

過水之北有漢溫令許續碑續字嗣公陳國人也舉賢
良拜議郎遷溫令延熹中立

虞詡碑

武平縣有漢尚書令虞詡碑題云虞君之碑諱詡字定
安康仲後為朝歌令武都太守文字多缺不復可尋按
范曄漢書詡字升卿陳國武平人祖為縣獄吏治存寬
恕嘗曰于公為里門子為丞相吾雖不及于公子孫未
必不為九卿故字詡曰升卿定安蓋其幼字也

柘令許君頌

許叔臺碑
許嬰碑

柘縣城內有柘令許君清德頌石碎字紊唯此文見碑

城西南里許有漢陽種令許叔臺碑光和中立又有漢故樂成陵令太尉掾許嬰碑嬰字虞卿司隸校尉之子建寧年立餘碑文字碎滅不復可觀當似司隸諸碑也

老子廟碑

魏石闕

過水北逕老子廟東廟前有二碑在南門外漢桓帝遣

中官管霸祠老子命陳相邊韶碑

北有雙石闕魏黃初三年逕譙所勒

孔子廟碑

又有孔子廟前有一碑西面是陳相魯國孔疇建和

三年立

李母冢碑

又有李母冢冢東有碑是永興元年譙令長沙王阜所
立碑云老子生於曲過間許慎又云過水首受淮陽扶
溝縣浪蕩渠不得至沛方為過水也過水又屈東逕相
縣故城南其城卑小實中邊韶老子碑又云老子楚相
縣人也相縣虛荒今屬苦故城猶存在賴游鄉之東過
水處其陽然即此城也

曹嵩碑

譙城南有曹嵩冢冢北有碑碑北有廟堂餘基尚存柱礎仍在廟北有二石闕雙峙高一丈六尺榱橰及柱皆彫鏤雲矩上復思已碎

曹騰碑

曹嵩闕北有圭碑題云漢故中常侍長樂大僕特進費亭侯曹君之碑延熹三年立碑陰又刊詔策二碑文同夾碑東西列對兩石馬高八尺五寸石作粗拙

潁川太守曹君碑

騰兄冢東有碑題云漢故潁川太守曹君墓延熹九年卒而不刊樹碑歲月

曹熾碑

潁川太守墳北有其元子熾冢東有碑題云漢故長水校尉曹君之碑歷太中大夫司馬長史侍中遷長水年三十九卒熹平六年造

曹脩碑

曹熾弟脩冢東有碑題云漢謁者曹君之碑熹平六年立

魏大饗碑

魏文帝以延康元年幸譙大饗父老立壇於故宅壇前樹碑題云大饗之碑

朱龜碑

過水東逕朱龜墓冢南枕道有碑題云漢故幽州刺史朱君之碑龜字伯靈光和六年卒官故吏別駕從事史

右北平無終年化中平二年造碑陰刊故吏姓名悉薊
涿及上谷北平等入

門生沛國蕭劉題名

山桑城東南有一碑碑文悉破無驗唯碑背故吏姓名
尚存熹平元年義士門生沛國蕭劉定興立

文穆碑

山桑縣東有文穆碑冢三世二千石穆郡戶曹史徵試
博士大常丞以明氣候擢拜侍中右中郎將遷九江彭

城陳留四郡光和中卒故吏涿郡太守彭城呂虔等立
熹平君碑

汜水逕睢陽縣襄鄉塢襄鄉浮圖漢熹平君所立死因
葬之弟刻石樹碑以旌厥德隧前有師子天鹿累塼作
百達柱八所荒蕪頽毀雕落略盡矣

橋載碑

睢城南有漢太傅掾橋載墓碑載字元賓梁國睢陽人
也睢陽公子熹平五年立城北五里有石虎石柱而無

碑誌

王子喬碑

薄城有王子喬冢冢側有碑題云仙人王子喬碑曰王子喬者蓋上世之真人聞其仙不知興何代也博問道家或言潁川或言東蒙初建斯城則有斯邱傳承先民曰王氏墓暨于永和之元年冬十二月當臘之夜上有哭聲其音甚哀附居者王伯怪之明則登而察焉時天鴻雪下無人徑有大鳥跡在祭祀處左右咸以為神其

後有人著大冠絳單衣杖竹立冢前呼採薪孺子伊永
昌曰我王子喬也勿得取吾墳上樹也忽然不見時令
太山萬熙稽故老之言感精瑞之應乃造靈廟以休厥
神於是好道之儒自遠方集或絃琴以歌太一或譚思
以歷丹田知至德之兆寔真人之祖先延熹八年秋八
月皇帝遣使者奉犧牲致禮祇懼之敬肅如也國相東
萊王章字伯義以為神聖所興必有銘表乃與長史邊
乾遂樹之玄石紀頌遺烈觀其碑文意似非遠旣在逕

見不能不書存耳

繹幕令碑

蒙縣有漢故繹幕令匡碑匡字公輔魯府君之少子也碑字碎落不可尋識不知所立歲月

袁安碑

魏徐庶碑

彭城城內有漢司徒袁安魏中郎徐庶等數碑並列植於街右咸曾為楚相也

盛允碑

虞縣有漢司徒公盛允碑允字伯世梁國虞人也其先
興氏至漢中葉避孝元皇帝諱改姓曰盛世濟其美以
迄于公察孝廉除郎累遷司空司徒延熹中立

廣野君廟碑

高陽有漢廣野君廟碑延熹六年十二月雍邱令董之
仰餘徽於千載遵茂美於絕代命縣人長照為文用章
不朽之德其略云輟洗分飡諮謀帝猷陳鄭有涿鹿之
功海岱無牧野之戰大康華夏綏靜黎物生民以來功

盛莫崇今故宇無間而單碑介立矣

楊彥楊禪二碑

鄆縣水次有單父令楊彥尚書郎楊禪字文節兄弟二碑漢光和中立

橋玄三碑

三鼎文
征鉞文

睢陽有漢大尉橋玄墓列數碑一是漢朝羣儒英才哲士感橋氏德行之美乃共刊石立碑以示後世一碑是故史司徒博陵崔烈廷尉河南吳整等以為至德在已

揚之由人苟不稱述夫何考焉乃共勒嘉石昭明芳烈
一碑是隴西枹罕北次陌碭守長隲為左尉漢陽徧道
趙馮孝高以橋公嘗牧涼州感三綱之義慕將順之節
以為公之勲美宜宣舊邦乃樹碑頌以昭令德光元和
年主記掾李友字仲遼作碑文碑陰有右鼎文建寧三
年拜司空又有中鼎文建寧四年拜司徒又有左鼎文
光和元年拜太尉鼎銘文曰故臣門人相與述公之行
咨度體則文德銘于三鼎武功勒于征鉞書于碑陰以

昭光懿又有鉞文稱是用鏤石假象作茲征鉞軍鼓陳之于東階亦以昭公之文武之勲焉

皇毓碑

臨睢有豫州從事皇毓碑殞身州牧陰君之罪時年二十五臨睢長平興李君二千石丞輪氏夏文則高其行而悼其殞州國咨嗟旌閭表墓昭叙令德式示後人

臨睢長王君碑

城內有臨睢長左馮翊王君碑善有治功累遷廣漢屬

國都尉吏民思德縣人公府掾陳盛孫郎中兒定興劉伯儔等共立石表政以刊遠績

鄭陂頌

鄭渾為沛郡太守於蕭相二縣興陂堰民賴其利刻石頌之號曰鄭陂

堯陵碑

地理志曰成陽有堯冢靈臺今成陽城西二里有堯陵陵南一里有堯母慶都陵於城為西南稱曰靈臺鄉曰

崇仁邑號修義皆立廟四周列水潭而不流水澤通泉
泉不耗竭至豐魚笱不敢採捕廟前並列數碑枯栢數
株檀棘成林二陵南北列馳道逕通皆以塼砌之尚修
整按郭緣生述征記自漢迄晉二千石及丞尉多刊石
述叙堯即位至永嘉三年二千七百二十有一載記述
堯妃見漢建寧四年五月成陽令管遵所立碑文云

季札子碑

奉高縣有吳季札子墓季札聘上國喪子於贏博之間

即此處也前有石銘一所漢末奉高令所立無所述叙
標誌而已自昔常蠲民戶洒掃之今不能然碑石糜碎
靡有遺矣唯故趺存焉

東平憲王碑

無鹽縣有東平憲王蒼冢碑闕存焉

孔廟碑

譙周云孔子死後魯人就冢次而居者百有餘家命曰
孔里孔叢子曰夫子墓塋方一里在魯城北六里泗水

上諸孔丘封五十餘所人名昭穆不可復識有銘碑三
所獸碣具存皇覽曰弟子各以四方奇木來植故多諸
異樹不生棘木刺草今則無復遺條矣

道兒君碑

高門一里餘道西有道兒君碑是魯相陳君立

魏孔廟碑

魏黃初二年文帝令郡國修起孔子舊廟置百戶吏卒
廟有夫子像列二弟子執卷立侍穆穆有詢仰之容漢

魏以來廟列七碑二碑無字枯栢猶茂

度尚碑

湖陸城東有度尚碑

漢高祖廟三碑

沛縣有漢高祖廟廟前三碑後漢立廟基以青石為之階陸尚存

泗水亭高廟碑

泗水亭有高廟廟前有碑延熹十年立廟闕崩禡略無

全者

陳球三碑

下邳有漢太尉陳球墓墓前有三碑是弟子管寧華歆等造

梧臺石社碑

臨淄梧臺西有石社碑猶存漢靈帝熹平五年立其題云梧臺里

孫嵩碑

朱虛縣汶水東北漢青州刺史孫嵩墓西有碑碣

孫賓碩碑

安邱縣牟山之西南有孫賓碩兄弟墓碑誌並在

鄭康成碑

高密縣有厲阜阜上有漢司農卿鄭康成冢石碑猶存

唐公房碑

智水川有唐公祠唐君字公房城固人也學道得仙人入雲臺山合丹服之白日升天鷄鳴天上狗吠雲中唯

以鼠惡留之鼠乃感激以月晦日吐腸胃更生故時人謂之唐鼠也公房升仙之日壻知行未還不獲同階雲路約以此川為居言無繁霜蛟虎之患其俗以為神因號為壻鄉故水亦名焉百姓為之立廟於其處刊石立碑表述靈異也

黃尚石闕

邵縣有黃家墓墓前有雙石闕雕制甚工俗謂之黃公石闕黃公名尚為漢司徒

秦頡二碑

宜城有漢南陽太守秦頡墓墓前有二碑頡郡人也以
江夏都尉出為南陽太守逕宜城中見一家東向頡住
車視之曰此居處可作冢後卒於南陽喪還至昔住車
處車不肯進故吏為市此宅葬之孤墳尚整

冠蓋里碑

宜城縣有太山山下有廟漢末名士居其中刺史二千
石卿長數十人朱軒華蓋同會於廟下荊州刺史行部

見之雅歎其盛號為冠蓋里而刻石銘之此碑於永嘉中始為人所毀其餘文尚有可傳者其辭曰峨峨南嶽烈烈離明寔敷雋乂君子以生惟此君子作漢之英德為龍光聲化鶴鳴此山以建安三年崩聲聞五六十里

華君銘

武當縣有一碑文字磨滅不可復識俗相傳是華君銘亦不詳華君何代之士

張仲瑜碑

郭先生碑

筑陽縣關林山之東有二碑其一即記關林山文曰君國者不躋高堙下先時或斷山岡以通平道民多病守長冠軍張仲瑜乃與邦人築斷故山道作此銘其一郭先生碑先生名輔字甫成有孝友悅學之美其女為立碑於此並無年號皆不知何代人也

張敏碑

魏張
詹碑

冠軍縣有漢太尉長史邑人張敏碑碑之西有魏征南軍司張詹墓墓有碑碑背刊云白楸之棺易朽之裳銅

鐵不入凡器不藏嗟矣後人幸勿我傷自後古墳舊冢
莫不夷毀而是墓至元嘉初尚不見發六年大水蠻饑
始被發掘說者言初開金銀銅錫之器朱漆彫刻之飾
爛然有二朱漆棺棺前垂竹簾隱以金釘墓不甚高而
內極寬大虛設白楸之言空負黃金之實雖意固南山
寧同壽乎

左伯豪碑

涅陽縣南有二碑碑字素滅不可復識云是左伯豪碑

衛彈勸碑

平氏縣城內有南陽都鄉正衛彈勸碑

胡著碑

湖陽有漢日南太守胡著碑子珍騎都尉尚湖陽長公
主即光武之伯姊也廟堂皆以青石為階陛廟北有石
堂珍之玄孫桂陽太守瑒以延熹四年遭母憂於墓次
立石祠勒銘于梁石祠傾頽而梁字無毀

樊重碑

樊萌碑
樊安碑

湖陽東城中有二碑似是樊重碑悉載故吏人名司馬彪曰仲山甫封於樊因氏國焉爰自宅陽徙居湖陽能治田殖至三百頃起廬舍高樓連閣波陂灌注竹木成林六畜放牧魚蠃鰾果檀棘桑麻閉門成市兵器器械貲至百萬其興功造作為無窮之巧不可言富擬封君世祖之少數歸外氏及之長安受業齋送甚至世祖即位追爵敬侯詔湖陽為重立廟置吏奉祠巡祠章陵常幸重墓湖陽故蓼國也城之東南有若令樊萌中常侍

樊安碑城南有數碑無字又有石廟數間依于墓側棟
宇崩毀惟石壁而已亦不知誰之冑族也

淮源廟三碑

桐栢山南有淮源廟廟前有碑是南陽郭苞立又二碑
並是漢延熹中守令所造文辭鄙拙殆不可觀

賈彪廟碑

新息北門內有新息長賈彪廟廟前有碑

孫叔敖廟碑

期思縣城之西北隅有楚相孫叔敖廟廟前有碑

衛為碑

魯陽縣有南陽都鄉正衛為碑

焦立碑

魯陽牛蘭水側有漢陽侯焦立碑

彭山廟碑

小渚水逕彭山西下有彭山廟廟前有彭山碑漢桓帝

元嘉三年杜仲長立

尹儉碑

彭水西北有漢安邑長尹儉墓冢西有石廟廟前有兩石闕闕東有碑闕南有二獅子相對南有石碣二枚石柱西南有兩石羊中平四年立

侯苞碑

隼縣渚水南有漢中常侍長樂太僕吉侯苞冢冢前有碑墓西枕岡城開四門門有兩石獸墳傾墓毀碑獸淪移人有掘出一獸猶全不破甚高狀頭去地幾一丈許

作制甚工左膊上刻作辟邪字門表壘上起石橋即時
不毀其碑云六帝四后是諂是諛蓋任自安帝没于桓
后于時閭閻擅權五侯暴世割剥公私以事生死夫封
者表有德碑者頌有功自非此徒何用許為石至于春
不若速朽芑墓萬古祇彰誚辱嗚呼愚亦甚矣

張平子碑

西鄂縣南有張平子墓墓之東側墳有平子碑文字悉
是古文篆額是崔瑗之辭盛弘之郭仲產並云夏侯孝

若為郡簿其文復刊碑陰為銘然碑陰二銘乃是崔子
玉及陳翕耳而非孝若悉是隸字二首並存當無毀壞
又言墓次有二碑今唯見一碑或是余夏景驛途疲而
莫究

王子雅碑

涪水南道側有二石樓相去六七丈雙跂齊竦高可丈
七八柱圓圍二丈有餘石質青綠光可以鑒上藥櫨承
拱雕簷四柱窮巧綺刻妙絕人工題言蜀郡太守姓王

字子雅南陽西鄂人有三女無男而家累千金父沒當
葬女自相謂曰先君生我姊妹無男兄弟今當安神玄
宅翳靈后土冥冥絕後何以彰吾君之德各出錢五百
萬一女築墓二女建樓以表孝思銘云墓樓東平林下
近墳墓而不能測其處所矣

魏黃權碑

預山南有魏車騎將軍黃權夫妻二冢地道潛通其冢
前有四碑其二魏明帝立二是其子及臣吏所樹者

范蠡碑

宛縣三公城側有范蠡祠蠡宛人祠即故宅也後漢末有范曾字子閔為大將軍司馬討黃巾賊至此祠為蠡立碑文勒可尋

光尼和碑

符縣長趙祉遣吏光尼和以永建元年十一月詣巴郡沒死成濡灘子賢求喪不得女終年二十五歲有二子五歲以還至二年二月十五日尚不得喪終乃乘小船

至父沒處哀哭自沉見夢告賢曰至二十一日與父俱出至日父子果浮出江上郡縣上言為之立碑以旌孝誠也

王子香廟頌

枝江縣有陳留王子香廟頌子香於漢和帝之時出為荊州刺史有惠政天子徵之道卒枝江亭中常有三白虎出入人間送喪踰境百姓追美甘棠以永元十八年立廟設祠刻石銘德號曰枝江白虎王君其子孫至今

猶謂之為白虎王

舜廟碑

九疑山南有舜廟前有石碑文字缺落不可復識山之東北冷道縣界又有舜廟縣南有舜碑碑是零陵太守徐儉立

二妃祠碑

湘水上黃陵廟大舜陟方二妃從征溺於湘江民為立祠於水側荊州牧劉表刊石立碑樹之於廟以旌不朽

之傳

屈原廟碑

程堅碑

汨水又西為屈潭即羅淵也淵北有屈原廟廟前有碑
又有漢南太守程堅碑寄在原廟

曲江龍中碑

瀧水又南逕曲江縣東又云縣昔號曲江山名也瀧中
有碑

曹娥碑

上虞縣有曹娥碑娥父盱迎濤溺死娥時年十四哀父尸不得乃號踴江介因解衣投水呪曰若值父尸衣當沉若不值衣當浮裁落便沉娥遂於沉處赴水而死縣令度尚使甥邯鄲子禮為碑文以彰孝烈

右東漢及魏正始以前碑見于水經者如此周秦先漢刻石皆用篆故不錄有不著歲月疑似難明者亦并載之道元罔羅四方異聞所涉獵者廣博傳疑書疑宜有譌誤而轉寫歲久後人更失其真時無善本

雌黃不可妄下若袁梁王紛之類則又仍其舊也其碑到今不毀者十財一二凡歐趙錄中所無者世不復有之矣姑聚其說以見思古之意夫物莫壽於金石而大書顯刻光沉迹絕者不可勝計獨傳之竹帛猶可久此君子所以取乎編類之書也水經曰上郡王次仲變倉頡舊文為隸秦皇三召不至令檻車送之次仲化為大鳥落翮於居庸山中又曰篆字文繁無會劇務秦用隸人之省謂之隸書或云即程邈於

雲陽增損者孫暢之嘗見青州刺史說臨淄人發古冢得桐棺隱起為字言齊太公六世孫胡公之棺惟三字是古餘同今隸書證知隸自出古非始於秦其說固已二三案齊胡公以周孝王時卒歷數世至宣王時始有大篆又數百年至秦有小篆既云隸出於篆不應篆未萌而隸先作也書傳多以隸為程邈所造兩漢書亦云然當据正史為是異端之說非所惑也

隸釋卷二十

欽定四庫全書

史部
隸釋卷二十一

詳校官編修臣潘庭筠

編修臣程嘉謨覆勘

總校官進士臣繆琪

校對官中書臣李斯咏

謄錄監生臣譚世緯

謄錄監生臣蕭準

欽定四庫全書

隸釋卷二十一

宋 洪适 撰

沛相楊君碑

楊君碑陰題名

郭先生碑

楊震碑

繁陽令楊君碑

高陽令楊君碑

文翁石柱碑

樊常侍碑

玄儒婁先生碑

老子銘

費亭侯曹騰碑

桂陽周府君碑

後本跋尾

桐栢廟碑

修西嶽廟復民賦碑

楊君碑陰題名

殘碑陰

朔方太守碑陰

朱龜碑

太尉劉寬碑

劉寬碑

孫叔敖碑

穀阮君神祠碑

樊毅修華嶽碑

祝睦碑

祝睦後碑

殘碑

修孔子廟器碑

泰山都尉孔君碑

吳雄修孔子廟碑

冀州從事張表碑

郭中侯碑

司隸從事郭究碑

田君碑

堯母碑

魯相晨孔子廟碑

楊君碑陰題名

無極山神廟

劉曜碑

小黃門譙君碑

太尉劉寬碑陰

武榮碑

郎中鄭固碑

班碑

魯峻碑

公昉碑

藁長蔡君頌

郎中王君碑

太尉陳球碑

北海相景君碑

金鄉守長侯君碑

集古錄上

物常聚於所好而常得於有力之彊有力而不好好之而無力雖近且易有不能致之象犀虎豹蠻夷山海殺人之外獸然其齒角皮革可聚而有也玉出崑崙流沙萬里之外

經十餘譯乃至乎中國珠出南海常生深淵採者腰絙而
入水形色非人往往不出則下飽蛟魚金礦于山鑿深而
穴遠篝火餽糧而後進其崖崩窟塞則遂葬於其中者率
常數十百人其遠且難而又多死禍常如此然而金玉珠
璣世常兼聚而有也凡物好之而有力則無不至也湯盤
孔鼎岐陽之鼓岱山鄒嶧會稽之刻石與夫漢魏已來聖
君賢士栢碑彝器銘詩序記下至古文籀篆分隸諸家之
字書皆三代以來至寶怪奇偉麗工妙可喜之物其去人

不遠其取之無禍然而風霜兵火湮淪磨滅散棄於山崖
墟莽之間未嘗收拾者由世之好者少也幸而有好之者又
其力或不足故僅得其一二而不能使其聚也夫力莫如好
好莫如一予性頗而嗜古凡世人之所貪者皆無欲於其
間故得一其所好於斯好之已篤則力雖未足猶能致之
故上自周穆王以來下更秦漢隋唐五代外至四海九州
名山大澤窮崖絕谷荒林破冢神仙鬼物詭怪所傳莫不
皆有以為集古錄以謂傳寫失真故因其石本軸而藏之

有卷帙次第而無時世之先後蓋其取多而未已故隨
其所得而錄之又以謂聚多而終必散乃撮其大要別
為錄目因并載夫可與史傳正其闕謬者以傳後學庶
益於多聞或譏予曰物多則其勢難聚聚久而無不散
何必區區於是哉予對曰足吾所好玩而老焉可也象
犀金玉之聚其能果不散乎予固未能以此而易彼也
廬陵歐陽修序

沛相楊君碑

右沛相楊君碑在閩鄉楊震墓側碑首尾不完失其名
字按後漢書震及中子秉秉子賜賜子彪皆有傳又云
震長子牧富波相牧孫奇侍中奇子亮陽成亭侯又云
少子奉奉子敷敷子衆務亭侯又有彪子修楊氏子孫
載于史傳者止此爾不知沛相為何人也碑云孝順皇
帝西巡以掾史召見拜郎中遷常山長史換犍為府丞
宰司累辟應于司徒州察茂才遷鮦陽侯相後拜議郎
五官中郎將沛相年五十六建寧元年六月癸丑遘疾

而卒其終始尚可見而惜其名字亡矣治平元年六月十日書

楊君碑陰題名

右楊君碑陰題名首尾不完全可見者四十餘人楊震子孫葬閩鄉者數世碑多殘缺此不知為何人碑陰其後有云右後公門生又云右沛君門生沛君疑是沛相者自有碑而亡其名字矣後公亦不知其為何人也治平元年六月十日書

郭先生碑

右郭先生碑云先生諱輔字甫成其先出于王季之中
子為文王卿士食采於虢後世謂之郭歷戰國秦漢子
孫流分來居荆土先生其少也孝友而悅學其長也寬
舒如好施是以宗親歸懷鄉鄰高尚年五十有二遇疾
而終其以而為如及用鄉鄰字與婁壽碑同蓋漢人如
此爾治平元年六月二十二日書

楊震碑

右楊震碑首題云漢故太尉楊公神道碑銘文字殘闕
首尾不完其可見而僅成文者云聖漢龍興神祇降祉
乃生于公又云窮神知變與聖同符鴻漸衡門羣英雲
集又云貽我三魚以章懿德又云大將軍辟舉茂才除
襄城令遷荊州刺史東萊涿郡太守又云司徒太尉立
朝正色恪勤竭忠其餘字存者多而不復成文矣治平
元年六月十日書

繁陽令楊君碑

右繁陽令楊君碑首尾不完文字磨滅可識者四百三十字不可識者六十一字碑云君遭叔父太尉薨委榮輕舉吏民攀轅守闕上書運轂萬斛助官賑貧以乞君還又云富波君之子也按漢書楊震子牧為富波相君廼牧子也叔父太尉者秉也出米乞令前史所無惜其名字磨滅不可見矣嘉祐八年十月二十三日書

高陽令楊君碑

右高陽令楊君碑首尾不完而文字尚可識云司隸從

事定賴侯相最後為善侯相善上一字磨滅不可見蓋其中間嘗為高陽令而碑首不書最後官者不詳其義也按楊震碑高陽令著震孫也今碑在震墓側

文翁石柱記

右文翁石柱記云漢初平五年倉龍甲戌旻天季月修舊築周公禮殿始自文翁開建泮宮據顏有意益州學館廟堂記按華陽國志文翁為蜀郡守造講堂作石室一名玉堂安帝永初間烈火為災堂及寺舍並皆焚燎

惟石室獨存至獻帝興平元年太守高朕於玉堂東復造一石室為周公禮殿有意又謂獻帝無初平五年當是興平元年蓋時天下喪亂西蜀僻遠年號不通故仍稱舊號也今檢范曄漢書本紀初平五年正月改為興平顏說是也治平元年六月十三日

樊常侍碑

右樊常侍碑云君諱安字子佑南陽湖陽人也君幼學治韓詩論語孝經歷中黃門拜小黃門小黃門右史遷

藏府令中常侍年五十有六永壽四年四月甲辰卒其
先為中黃門後為小黃門又為小黃門右史蓋漢官之
制今不詳其次序也余少家漢東天聖四年舉進士赴
尚書禮部道出湖陽見此碑立道左下馬讀之徘徊碑
下者久之後三十年始得而入集錄蓋初不見錄于世
自予集錄古文時人稍稍知為可貴自此古碑漸見收
采也嘉祐八年十月十四日書

玄儒婁先生碑

右玄儒婁先生碑云先生諱壽字九考南陽隆人也祖太常博士父安貧守賤不可營以祿先生童孩多奇岐嶷有志好學不厭不飾小行善與人交久而能敬榮沮溺之耦耕甘山林之杳靄又曰有朋自遠冕紳莘莘講習不倦年七十有八熹平三年二月甲子不祿今光化軍乾德縣圖經載此碑景祐中余自夷陵貶所再遷乾德令按圖求碑而壽有墓在穀城界中余率縣學生親拜其墓見此碑在墓側遂據圖經遷碑還縣立於勅書

樓下至今在焉治平元年八月十三日

老子銘

右老子銘按桓帝紀云延熹八年正月遣中常侍左悺之苦縣祠老子至十一月又遣中常侍管霸祠之而此碑云八月夢見老子而祠之世言碑銘蔡邕作今檢邕集無此文皆不可知也

中常侍費亭侯曹騰碑

右中常侍費亭侯曹騰碑文字磨滅其粗可見者云維

建和元年七月二十二日己巳皇帝若曰其遣費亭侯之國其餘不可識也建和桓帝即位之元年也後三十七年獻帝中平元年騰養子操始為騎都尉擊黃巾矣治平元年六月十日書

桂陽周府君碑

右桂陽周府君碑按韶州圖經云後漢桂陽太守周府君廟在樂昌縣西一百一十八里武溪上武溪驚湍激石流數百里昔馬援南征其門人轅寄生善吹笛援為

作歌和之名曰武溪深其辭曰滔滔武溪一何深鳥飛
不渡獸不能臨嗟哉武溪何毒淫周使君開此溪下合
真水桂陽人便之為立廟刻石又云碑在廟中郭蒼文
今碑文磨滅云府君字君光而名已訛缺不可辨圖經
但云周使君亦不著其名後漢書又無傳遂不知為何
人也按武水源出郴州臨武縣鸕鷀石南流三百里入
桂陽而桂楊桂水真水梨溪盧溪曹溪諸水皆與武水
合流其俗謂水湍浚為瀧韓退之詩云南下樂昌瀧即

此水也碑首題云神漢者如唐人云聖唐爾蓋當時已為此語而史傳他書無之獨見於此碑也

後本跋尾

右周府君碑余初得前本恨其名遂磨滅後有國子監直講劉仲章者為余言前為樂昌令因道府君事云名憬問其何以見之云碑刻雖闕尚可識也乃以此碑并陰遺余蓋前本特模者不工爾又余初以韓集云昌樂瀧疑其誤乃改從樂昌仲章曰不然縣名樂昌而瀧名

昌樂其舊俗所傳如是韓集不誤也乃知古人傳疑而慎於更改者以此治平二年六月二十二日

桐栢廟碑

右桐栢廟碑磨滅雖不甚而文字斷續粗可考次蓋南陽太守修廟碑也其辭云延熹六年正月乙酉南陽太守中山盧奴君奴下正闕一字當是其姓又云尊神敬祀立廟桐栢春秋宗禳災異告變水旱請求位比諸侯聖漢所尊太守奉祀二十餘年不復身至遣丞行事簡

略不敬明神弗歆災異以生五嶽四瀆與天合德仲尼
慎祭常若神在君準則大聖親之桐栢來見廟祠崎嶇
逼狹開拓神門立闕四望增廣壇場又云執玉以沉為
民祈福靈祈報祐天地清和其大意止於如此其後有
頌亦可讀第不見太守姓名爾然不著他事惟修廟祀
神爾桐栢淮瀆廟也治平元年六月十三日

修西嶽廟復民賦碑

右修華嶽廟請復民賦碑云光和二年十二月庚午朔

十三日壬午弘農太守臣毅頓首死罪上尚書臣毅頓
首頓首死罪死罪謹按文書臣以去元年十一月到官
其十二月奉祠西嶽華山省視廟舍及齋衣祭器率皆
久遠有垢臣以神嶽至尊宜加恭肅輒遣行事荀班與
華陰令先讜以漸繕治成就之後仍雨甘雪又曰讜言
縣當孔道加奉尊嶽一歲四祠養牲百日用穀藁三千
餘斛或有請雨齋禱役費兼倍小民不堪有饑寒之窘
違宗神之敬乞差諸賦復華下十里以內民租田口筭

臣輒聽盡力奉宣詔書思惟惠利增異復上臣毅誠惶
誠恐頓首頓首死罪死罪上尚書漢家制度今不復見
惟余家集錄漢碑頗多故於磨滅之餘時見一二而此
碑粗完故錄其首尾以傳臣毅者樊毅也治平元年六
月十四日書

楊君碑陰題名

右楊君碑陰題名楊氏世葬閩鄉墓側皆有碑今其存
者四余家集錄皆得之乃太尉沛相高陽繁陽令也此

碑陰者不知為何人碑文字殘闕其僅存者十五人又滅其一其在者十四人曰懷陵園令相蔣禧字武仲宜祿長蕭劉瑞字仲祐孝廉杼秋劉旭字子明大官日丞譙曹臻字建國辭曹史鄆公孫銀字山根門下書佐史韓純字子敬豐畢珮字廣世鄆孟蹤字河雒決曹書佐鄆公孫暘字元暘皆稱故吏又有故吏贊陳俊字仲顯鄆夏陽字儀公鄆兒銀字伯玉杼秋劉順字子選沛周儀字帛民凡五人皆不著職但稱故吏而孟縱字河雒

周儀字帛民文字皆完非訛謬而莫曉其義也治平元年六月十四日書

殘碑陰

右殘碑陰前後磨滅不知為何人碑其知為漢碑者蓋其隸字非漢人莫能為也其字僅可見者尚數十而姓名完者九人曰王伯鄉趙仲方賈元周王景陽賈元輔宗石處王仲宣馬安國王通國皆無官號邑里莫知為何人惟漢隸在者少為難得故錄之治平元年五月十

八日書

朔方太守碑陰

右朔方太守碑陰題云永壽二年朔方太守上郡仇君
察察下減一字除郎中大曲長大下又減一字延熹四
年九月乙酉詔書遷衙令五年正月到官奉見明府見
下又減一字立祠刊石表章大聖之遺靈永示來世之
末末下又減一字謹出錢千千下又減兩字者下行因
紀姓名據此乃當時修廟出錢人爾今其姓名往往可

見云衙鄉三老時勤伯秋上官鳳季方錄事史楊禹孟
布衙主記掾楊綬子長門下功曹裴篤伯安倉曹掾任
就子優又有集曹掾軍假司馬之類名字多不完其所
出錢不過三百至五百蓋漢世物輕幣重今華嶽孔子
廟碑陰所列亦皆如此其所立祠蓋不知為何廟也治
平元年夏至日書

朱龜碑

右朱龜碑云字伯靈察孝廉除郎中尚書侍郎以將事

去官于時幽州州下滅一字夷侵寇以君為御史中丞
討伐其後磨滅又云鮮卑侵犯障塞復舉君拜幽州刺
史年六十四光和六年卒龜之事迹不見史傳其僅見
於此碑者如此碑在今亳州界中云將事去官莫曉其
語後余守亳州徙
碑置州學中治平元年六月十四日書

太尉劉寬碑

右太尉劉寬碑寬漢書有傳其官闕始卒與碑多同而
傳載遷官次序頗略蓋史之所記善惡大節官次雖小

略不足為實惟其繆誤不可不正碑云大將軍以禮脅
命拜侍御史遷梁令三府並用博士徵皆不就司隸校
尉舉茂材太尉舉有道公車徵拜議郎司徒長史而傳
但云大將軍辟五遷司徒長史今據碑止四遷爾博士
未嘗拜也碑於長史下遂云入登侍中延熹八年地震
有詔詢異轉拜尚書遷南陽太守拜太中大夫復拜侍
中屯騎校尉宗正光祿勳遂授太尉傳至太中大夫始
云遷侍中其前自長史入登侍中史闕書也碑又云固

疾遜位拜光祿大夫遷衛尉復作太尉而傳云以日食免拜衛尉以日食免當從傳為正而不書光祿大夫史闕也其餘皆同故不復錄治平元年六月十四日書

劉寬碑

右太尉車騎將軍特進遼鄉昭烈侯劉公碑公諱寬有兩碑皆在洛陽余家集錄皆得之其一故吏李謙等立而此碑門生殷苞等所立其所書與李謙等所載不異惟漢隸難得當錄漢公卿卒故吏門生各自立碑以伸

感慕惟見於此今人家碑碣非其子孫則他人不為立也治平元年六月十四日書

孫叔敖碑

右孫叔敖碑云名饒字叔敖而史記不著其名而見於他書者亦皆曰叔敖而已微斯碑後世遂不復知其名饒也此碑世亦罕傳余以集錄二十年間求之博且勤乃得之然則世之未見此碑者猶不知為名饒也謂余集古為無益可乎

穀阮君神祠碑

右穀阮君神祠碑今在鄭縣慶歷中樞密直學士施君
為陝西轉運使為余模此本云碑文磨滅初不可辨以
麴填其刻稍尋其點畫命工鐫石之乃可讀漢碑今在
者類多磨滅不完故獨斯碑歷歷可見也惟裴瞻姓名
為鄉人鐫去矣穀阮所以畜洩水患據碑文云自亡新
以來廢之則前漢時已有之矣光和中瞻為鄭縣令始
修復之事見水經及華州圖經穀阮君祠今謂之五部

神廟其像有石隄西戍樹谷五樓先生東臺御史王翦將軍皆莫曉其義施君名昌言今為涇原路安撫使治平元年二月一日書

樊毅修華嶽碑

右樊毅修華嶽廟碑云惟光和元年歲在戊午名曰咸池季冬己巳弘農太守河南樊君諱毅字仲德下車之初恭肅神祀西嶽至尊詔書奉祠躬親自往齋室逼窄法齋無所於是與令已郡胸忍先讜圖議繕故二年正

月己卯興就刻茲碑號吏卒挾路據此碑乃即時所立而太守生稱諱者何哉治平元年末伏日書

祝睦碑

右祝睦碑云君諱睦字元其下遂缺滅不能成文惟其官壽年月可見云賓于王庭除北海長史潁川鄆令辟司空府北軍中候拜大尚書僕射遷常山相山陽太守年六十有八延熹七年八月丁巳卒睦有二碑皆在今南京虞城縣此碑不見世次而隱隱有云其先高辛爾

其後碑則頗完故錄於次也治平元年六月立秋日書

祝睦後碑

右祝睦後碑其前碑不知所立人名氏兩碑所載官閥
壽考年月悉同而此碑有立碑人名氏及睦世次云故
吏王堂等竊聞下有述上之功臣有叙君之德又曰君
兆自黎牟祝融苗胄鄭有祝聃君其脩也其餘文字亦
完可讀二銘皆以三言為文而後銘猶完云穆我君邦
之陽資五就闡道綱綱下減一字表微準樞衡稽列宿

覽四方德合乾道應皇領二郡曜重光化流洽緄幽昌
性天約元用長頌聲作謠令香功烈著遺椒芳存覲榮
淪弗忘其後二句磨滅難詳故錄其成文以見其雅質
亦可佳也治平元年六月立秋日書

殘碑

右殘碑不知為何人所存者纔三十二字不復成文惟
云高字幼知其名高又云漢興復知為後漢時人而隸
字在者甚完體質淳勁非漢人莫能為也故錄之

修孔子廟器表

右韓明府修孔子廟器碑云永壽二年青龍在泥灘霜月之靈皇極之日永壽桓帝年號也按爾雅云歲在申曰泥灘桓帝永興三年正月戊申大赦改元永壽明年丙申曰歲在泥灘是矣云霜月之靈皇極之日者莫曉其義疑是九月五日前漢文章之盛庶幾三代之純深自建武以後頓爾衰薄崔蔡之徒擅名當世然其筆力辭氣非出自然與夫楊馬之言醇醜異味矣及其末也

不勝其弊霜月皇極是何等語韓明府者名敕字叔節
前世見於史傳未有名敕者豈自余學之不博乎春秋
左氏傳載古人命名之說不以為名者頗多故以敕為
名者少也治平元年二月晦日書

泰山都尉孔君碑

右泰山都尉孔君碑云君諱宙字季將孔子十九世之
孫也年六十一延熹四年正月乙未以疾卒其序官閭
甚簡又或殘滅不完但見其舉孝廉為郎遷元城令遂

為泰山都尉爾其辭有云躬忠恕以及人兼禹湯之罪
己宙為人臣而引禹湯以為比在今人於文為不類蓋
漢世近古簡質猶如此治平元年閏五月二十一日書

吳雄修孔子廟碑

右魯相置孔子廟卒史碑云司徒臣雄司空臣戒稽首
言魯前相瑛書言詔書崇聖道孔子作春秋制孝經演
易繫辭經緯天地故特立廟裊成侯四時來祠事已即
去廟有禮器無常人掌領請置百石卒史一人典主守

廟謹問太常祠曹掾馮牟史郭玄辭對故事辟雍祠先
聖太宰太祝各一人備爵太常丞監祠河南尹給牛羊
豕大司農給米臣愚以謂如瑛言可許臣雄臣戒愚慙
誠惶誠恐頓首頓首死罪死罪臣稽首以聞制曰可按
漢書元嘉元年吳雄為司徒二年趙戒為司空即此云
臣雄臣戒是也魯相瑛者據碑言姓乙字仲卿漢碑在
者多磨滅此幸完可讀錄之以見漢制三公奏事如此
與羣臣上尚書者小異且又見漢祠孔子其禮如此治

平元年六月二十日書

冀州從事張表碑

右冀州從事張表碑云君諱表字元異其碑首題云漢故冀州從事張君碑而文為韻語叙其官閥不甚詳但云春秋六十四以建寧元年三月癸巳寢疾而終其辭有云仕郡為督郵鷹撮盧擊是以狗喻人也又有畔桓利正之語蓋漢人猶質不嫌取類於鷹犬畔桓疑是盤桓文字簡少假借爾治平元年六月二十九日書

郭中侯碑

右北軍中候郭君碑其名字磨滅云元城君第四子也
其先蓋周之冑緒枝葉雲布列於州郡自東郡衛國家
於河內汲兄竹邑候相次尚書侍郎次濟北相順弟臨
沂長次徐州刺史次中山相次維陽令君為五官掾功
曹司隸中都官從事三辟將軍府舉廉比陽長復辟司
徒拜北軍中候年六十有六建寧四年九月丙子卒其
於兄竹邑侯相上一字闕滅不完疑是惠字其下又云

順弟莫曉其義豈漢人謂兄弟為此語耶故闕其疑以俟知者治平元年六月二十九日書

司隸從事郭究碑

右司隸從事郭君碑云君諱究汲人也元城君之孫雒陽令之適歷主簿督郵五官掾功曹守令長辟司隸從事部郡都官春秋二十八而卒中平元年歲在甲子三月而葬據北軍中侯碑為元城君子而弟為雒陽令考其世次皆同前世碑碣但書子孫而不及兄弟惟郭氏

碑載其兄弟甚詳蓋古人譜牒既完而於碑碣又詳如此可見其以世家為重不若今人之苟簡也治平元年六月二十九日書

田君碑

右田君碑在今沂州其名字皆已磨滅惟云其先出自帝舜之苗裔自完適齊因以為氏乃知其姓田爾又云周察之際家於東平陽君摠角修韓詩京氏易究洞神變窮奧極微為五官掾功曹州從事辟太尉延熹二年

辛亥詔書泰山琅邪盜賊未息州郡更有仁惠公清撥煩整化者試守滿歲為真州言名時牧劉君知君宿操表上試守費自此以後殘闕不可次第而隱隱可見蓋無年壽卒葬月日而有故吏薛咸等立石勒銘之語迺費縣令長德政去思碑爾治平元年六月二十九日書

堯母碑

右堯母祠碑漢建寧五年造其文略曰堯母慶都感赤龍而生堯遂以侯伯恢踐帝宮

下闕

慶都僂歿蓋葬于

茲欲人莫知名曰靈臺上立黃屋堯所奉祀三代改易

荒廢不修漢受濡期興滅繼絕如堯為之遂遭亡新禮

祠絕矣故廷尉

姓名唐滅不可讀

深惟大漢堯之苗胄當修堯

祠追遠復舊前後奏上帝納其謀歲以春秋奉太牢祠

時濟陰太守魏郡審晃成陽令博陵管遵各遣大掾輔

助

闕一字

君經之營之不日成之此其大槩也按皇覽云

堯冢在濟陰城陽呂氏春秋云堯葬穀林皇甫謐云穀

林即成陽然自史記地志及水經諸書皆無堯母葬處

惟見於此碑蓋亦葬城陽也而諸書俗本多為城陽獨此碑為成陽當以碑為正碑後列當時人名氏又云審晃字元讓管遵字君臺又云漢受濡期莫曉其義也治平元年三月二十九日書

魯相晨孔子廟碑

右魯相上尚書章其略云建寧二年三月癸卯朔七日己酉魯相臣晨長史臣謙頓首死罪上尚書臣晨頓首頓首死罪死罪臣以元年到官行秋饗飲酒泮宮復禮

孔子宅而無公出酒脯之祠臣輒依社稷出王家穀春秋行禮建寧靈帝年號也於此見漢制天子之尊其辭稱頓首死罪而不敢斥至尊因尚書以致達而已余家集錄漢碑頗多亦有奏章患其磨滅獨斯碑首尾完備可見當時之制也又云孔子乾坤所挺西狩獲麟為漢制作故孝經援神契曰玄丘制命帝卯行又尚書考靈曜曰丘生倉際觸期稽度為赤制識緯不經不待論而可知甚矣漢儒之狹陋也孔子作春秋豈區區為漢而

已哉治平元年三月二十五日書

楊君碑陰題名

右楊君碑陰題名凡一百三十一人有稱故吏者故民者處士者故功曹史者故門下佐者類例不一似當時人各隨意書之而文字磨滅僅可讀其姓名字俱完可識者八十三人其餘或在或亡蓋後漢楊震墓域中碑也楊氏墓在閬鄉有碑數廳皆漢世所立余家集錄得其四震及沛相繁陽高陽令碑并得碑陰題名然得時

參錯不知為何碑之陰也其名氏可見者當時皆無所稱述顧其人亦不足考究第以漢隸真蹟金石所傳者至今類多磨滅可惜故錄之爾治平元年三月晦日書

無極山神廟碑

右無極山神廟碑文字磨滅斷續然尋繹次敘其可見者尚可成文云太常臣耽丞敏頓首上尚書謹按文書男子常山蓋高上黨范遷為元氏三公神山去年五月常山相巡詣山請雨山神即使高傳言白國縣即與封

龍靈山無極山共興雲雨常山相巡元氏令王翊各以一白羊賽復使高與遷俱詣太常為無極山神索法食臣疑高遷言不實輒移本國今常山相巡書言郡督郵言無極山體可三里所立石為體長二丈五尺所山周匝二十餘里其三公封龍靈山皆得法食乞令無極山比三山祠牲出王家以珪璧為信愚臣如巡言請以少府給珪璧故事須報臣耽愚顛頓首頓首上尚書制曰可尚書令忠奏雒陽宮太常丞書從事光和四年八月

十七日丁酉尚書令忠下太常耽丞敏下常山相其奏
章如此其後遂言造廟事而有銘其文多不載按漢奏
章首尾皆言臣某頓首頓首死罪死罪上尚書而此碑
所載太常章首尾不稱死罪而丞敏又不稱臣莫曉其
制碑後又列常山官屬云常山相南陽馮巡字季祖元
氏令王翊字元輔云治平元年四月一日書

劉曜碑并陰

右劉曜碑并陰在今鄆州界中文字磨滅僅有存者云

韓曜字季尼年七十三其餘爵里官閥卒葬歲月皆不可見字為漢隸亦不甚工惟其銘云天臨大漢錫以明哲碑首題云漢故光祿勳東平無鹽劉府君之碑以此知為漢碑也治平元年四月一日書

小黃門譙君碑

右小黃門譙君碑云君諱敏字漢達年五十七中平二年卒其文不甚磨滅而官閥無所稱述惟云肅將王命守靜韜光以遠悔咎而已後漢宦者用事靈帝時尤盛

敏卒之歲張讓等十二人封侯於斯之時能守靜遠悔
是亦可佳然敏以一小黃門而立碑稱頌於此可見官
官之盛也治平元年四月三日書

太尉劉寬碑陰

右太尉劉寬碑陰題名寬碑有二其故吏門生各立其
一也此題名在故吏所立之碑陰其別列於後者在寬
子松之碑陰也寬以漢中平二年卒至唐咸亨元年其
裔孫胡城公爽以碑歲久皆仆于野為再立之并記其

世序嗚呼前世士大夫世家著之譜牒故自中平至咸亨四百餘年而爽能知其世次如此之詳也蓋自黃帝以來子孫分國受姓庶堯舜三代數千歲間詩書所記皆有次序豈非譜繫源流傳之百世而不絕歟此古人所以為重也不然則士生於世皆莫自知其所出而昧其世德遠近其所以異於禽獸者僅能識其父祖耳其可忽哉唐世譜牒尤備士大夫務以世家相高至其弊也或陷輕薄婚姻附託邀求貨賂君子患之然而士子

修飭喜自樹立兢兢惟恐墜其世業亦以有譜牒而能知其世也今之譜學亡矣雖名臣巨族未嘗有家譜者然而俗習苟簡廢失者非一豈止家譜而已哉嘉祐八年七月二十九日書

武榮碑

右武榮碑云君諱榮字含和治魯詩韋君章句孝經論語漢書史記左氏國語為州書佐郡曹史主簿督郵五官掾功曹年三十六汝南蔡府君察舉孝廉執金吾丞

孝桓大憂屯守玄武闕如遇害氣遭疾殞靈其餘文字殘闕不見其卒葬年月又不著氏族所出惟其碑首題云漢故執金吾丞武君之碑云治平元年五月六日書

郎中鄭固碑

右郎中鄭固碑文字磨滅其僅可見者云諱固字伯堅孝友著于閨門至行立乎鄉黨初授業於歐陽仕郡諸曹掾史主簿督郵五官掾功曹又曰忠以衛上清以自修其餘殘闕不復成文又云延熹元年二月詔拜郎中

非其好也以疾錮辭年四十二遭命殞身而中間又有
逡遁退讓之語遁當作循錮當作固疑漢人用字多假
借又疑以疾錮辭謂疾已堅固若云以疾篤辭覽者詳
之治平元年四月十二日書

班碑

右班碑者蓋其字畫殘滅不後成文其氏族州里官闕
卒葬皆不可見其僅見者曰君諱班耳其首書云建元
年太歲在丁亥而建下一字不可識以漢書考之後漢

自光武至獻帝以建名元者七謂建武建初建光建康
建和建寧建安也以歷推之歲在丁亥迺章帝章和元
年後六十一年桓帝即位之明年改本初二年為建和
元年歲又在丁亥則此碑所闕迺建和元年也碑文闕
滅者十八九惟亡者多而存者少尤為可惜也故錄之
治平元年四月二十日書

魯峻碑

右魯峻碑云君諱峻字仲嚴山陽昌邑人監營謁者之

孫修武令之子治魯詩顏氏春秋舉孝廉除郎中謁者
河內太守丞辟司徒府舉高第御史東郡頓丘令遷九
江太守拜議郎太尉長史御史中丞司隸校尉遭母憂
自乞拜議郎服竟還拜屯騎校尉以病遜位熹平元年
卒門生于商等二百三十人謚曰忠惠父其餘文字亦
粗完故得其遷拜次序頗詳以見漢官之制如此惟云
遭母憂自乞拜議郎又其最後為屯騎校尉而碑首題
云漢故司隸校尉忠惠父魯君碑二者莫曉其義治平

元年四月二十三日書

公昉碑

右公昉碑者迺漢中太守南陽郭芝為公昉修廟記也漢碑今在者類多磨滅而此記文字僅存可讀所謂公昉者初不載其姓名但云君字公昉爾又云耆老相傳以為王莽居攝二年君為郡吏啖瓜旁有真人左右莫察君獨進美瓜又從而敬禮之真人者遂與期谷口山上迺與君神藥曰服藥以後當移意萬里知鳥獸言語

是時府君去家七百餘里休謁往來轉景即至闔郡驚
烏白之府君徙為御史鼠齧被具君乃畫地為獄召鼠
誅之視其腹中果有被具府君欲從學道頃無所進府
君怒勅尉部吏收公昉妻子公昉呼其師告以厄其師
以藥飲公昉妻子曰可去矣妻子戀家不忍去於是迺
以藥塗屋柱飲牛馬六畜須臾有大風雲來迎公昉妻
子屋宅六畜儼然與之俱去其說如此可以為恠妄矣
嗚呼自聖人沒而異端起戰國秦漢以來奇辭怪說紛

然爭出不可勝數久而弗知從來自西夷老之徒起於中國而二患交攻為吾儒者往往牽而從之其卓然不惑者僅能自守而已欲排其說而黜之常患乎力不足也如公昉之事以語愚人豎子皆知其妄矣不待有力而後能破其惑也然彼漢人乃刻之金石以傳後世其意惟恐後世之不信然後世之人未必不從而惑也治平元年四月二十三日以旱開宮寺祈雨五日中一日休務假書

棠長蔡君頌

右棠長蔡君頌碑在鎮府故天章閣待制楊旼嘗為余言漢時隸書在者此最為佳旼自言平生惟學此字余不甚識隸書因旼言遽遣人之常山求得之遂入于錄

郎中王君碑

右王君碑文字磨滅不復成文而僅有存者其名字官闕卒葬年月皆莫可考惟其碑首題云漢故郎中王君之銘知其為漢人姓王氏而官為郎中爾蓋夫有形之

物必有時而弊是以君子之道無弊而其垂世者與天地而無窮顏回高卧於陋巷而名與舜禹同榮是豈有託於物而後傳耶豈有為於事而後著耶故曰久而無弊者道隱而終顯者誠此君子之所貴也若漢王君者託有形之物欲垂無窮之名及其弊也金石何異乎瓦礫也治平元年四月晦日書

太尉陳球碑

右太尉陳球碑云君諱球字伯真廣漢太守之元子也

又云除郎中尚書符節郎慎陵園令換中東城門候遷
繁陽令拜侍御史其後又云拜將作大匠其餘磨滅僅
存按後漢書球傳云父亶廣漢太守陽嘉中球舉孝廉
稍遷繁陽令太尉楊秉表球零陵太守後累拜司空光
和元年遷太尉坐日食免復拜光祿大夫與司徒劉劭
等謀誅宦官曹節等不果下獄死球在零陵破賊胡蘭
朱蓋有功威著南邦今碑破蘭蓋事班班可讀與傳皆
合惟不著誅宦官事至其卒時文字磨滅不可識惟云

六十有二亦與傳合余所集錄古文與史傳多異惟此碑所載與列傳同也治平元年四月晦日書

北海相景君碑

右北海相景君銘其碑首題云漢故益州太守北海相景君銘其餘文字雖往往可讀而漫滅多不成文故君之名氏邑里官闕皆不可考其可見者云惟漢安二年北海相任城府君卒城下一字不可識當為景也漢功臣景丹封櫟陽侯傳子尚尚傳子苞苞傳子臨以無嗣

絕安帝永初中鄧太后詔封苞弟遽為監亭侯以續丹
後自是而後史不復書而他景氏亦無顯者漢安順帝
年號也君卒於順帝時蓋與遽同時人也碑銘有云不
永麋壽余家集錄三代古器銘有云眉壽者皆為麋蓋
古字簡少通用至漢猶然也治平元年四月二十九日
書

金鄉守長侯君碑

右金鄉守長侯君碑云君諱成字伯盛山陽防東人也

其先出自豳岐周文之後封于鄭鄭共仲賜氏曰侯厥脩宣多以功佐國漢之興也侯公納策濟太上皇於鴻溝之阨謚曰安國君曾孫酺封明統侯光武中興玄孫霸為臨淮太守轉拜執法右刺姦五威司命大司徒公封於陵侯枝葉繁茂或家河洧或邑山濟君即上黨太守之弟郡請署主簿督郵五官掾功曹守金鄉長建寧二年四月癸酉卒年八十一碑文首尾皆完故得詳其世次其云上黨太守不見其名按漢書執法左右刺姦

五威司命皆王莽官名侯霸列傳云霸莽時為隨令遷
執法刺姦而未嘗為五威司命後事光武代伏湛為大
司徒封關內侯既薨光武下詔追封則鄉侯而此碑言
封於陵侯未知孰是據碑言刺姦司命為光武時官蓋
碑之謬治平元年四月二十九日書

隸釋卷二十一